



Vischnaunca Ruschein

Lescha da scoletta dalla vischnaunca Ruschein

Questa lescha se basa sin la lescha da scoletta dil cantun Grischun dils 17.5.1992

Art. 1 Sereferescha

Persunas, officials e funcziunaris en quella lescha sereferescha sin omisduas schlatteinas.

Art. 2 Incumbensa

La scoletta sustegn ils geniturs ell'educaziun da lur affons. Ella promova las forzas creativas sco era corporalas, spirtalas e socialas digl affon.

La scoletta sesprova d'integrar affons mendus sco era affons da lungatg jester.

Ella prepara ils affons sin l'entschatta dalla scola primara, denton senza tractar la materia da scola (leger, scriver ed aritmetica).

Art. 3 Purtader

Las vischnauncas de Ruschein e Ladir sorprendan ils cuosts da menaschi da scoletta tenor conforma cunvegna davart la gestiun d'in communabel menaschi da scola e scoletta e la repartiziun dils cuosts da menaschi.

Art. 4 Cuoz

La scoletta ei buca obligatoria, mintg'affon ha denton la pusseivladad da frequentar la scoletta duront 2 onns.

In affon annunziaus per la scoletta sto frequentar quella regularmein.

Il temps da scola dalla scoletta ei identics cul temps da scola dalla scola primara.

Art. 5 Absenzas

Sco motivs d'absenza valan en special:

1. Accident e malsogna digl affon, event. dils geniturs
2. Malsognas infectusas da persunas en famiglia e da cunhabitonts
3. Mortori d'ina persuna en famiglia ni da tierparents

Las absenzas ston vegnir annunziadas alla mussadra.

Art. 6 Congedis

Il conceder **en cass urgents** congedis tochen 3 dis ad onn schai ella cumpetenzza dalla mussadra. Ulteriuras lubientschas schain ella cumpetenzza dil cussegl da scola e ston vegnir fatgas en scret silmeins 1 jamna avon.

Art. 7 Survigilonza

Il menaschi da scoletta vegn survegliaus dil cussegl da scola, dall'inspectura tenor directivas dil departement d'educaziun sco era dalla Regenza cantunala. Ils affons stattan sut la survegionza dalla mussadra. Discuors denter geniturs, resp. lur substituents e mussadra ston haver liug ordeifer il temps d'instrucziun. Ils geniturs han il dretg da contactar il cussegl da scola a scret, sch'ei dat negina cunvegnientscha culla mussadra.

Art. 8 Recuors

Encunter decisiuns e disposiziuns dil cussegl da scola partenent fatgs da scoletta san ils pertuccai recuorer enteifer 15 dis tier il departement d'educaziun cantunal.

Cussegl da scola

Art. 9 Dretgs e duers

1. **Encurir e far proposta per mauns dalla suprastanza communal per eleger, reeleger (mintga 2 onns) ni relaschar** la mussadra
2. El procura per bien manteniment dalla localitad e dils indrezs da scoletta
3. **Tscherchar e far proposta alla suprastanza communal per eleger il miedi ed il dentist da scoletta**
4. **Organisar il survetsch medicinal e dental**
5. Conceder alla mussadra congedi per conferenzas, cuors ed autras activitads durant il temps da scola **tenor recumandaziuns dil departement d'educaziun cantunal**
6. Preparar la lescha da scoletta per mauns dalla suprastanza communal
7. Il cussegl tracta discretamein tut ils cass che stattan en connex cun la scoletta
8. Il cussegl da scola assista 2 tochen 4 gadas ad onn all'instrucziun e sediscuora cun la mussadra per far in maletg dalla situaziun actuala en scoletta. El promova e sustegn la mussadra en sia lavur.
9. Publicaziun per las annunzias da scoletta el fegl official. Surdada dalla gliesta (1. zercladur) alla mussadra.

Art. 10 Finanzas

Per la cumpra da mieds d'instrucziun, per material d'instrucziun ed ulteriur material da scoletta dispona il cussegl da scola d'ina summa annuala, **fixada dalla suprastanza communal tenor stipulaziun en la costituziun communal.**

Mussadra

Art. 11 Nominaziun

Las cundiziuns dalla piazza dalla mussadra ein reglamentadas tenor lescha da vischnaunca e cantun.

Il cussegl da scola sa schar assister allas sedutas la mussadra, quei cun vusch consultativa.

Lavurs accessorias ni uffecis basegnan la lubientscha dil cussegl da scola e san vegnir concedi mo sche l'instrucziun pitescha buca giudlunder.

Art. 12 **Cumpetenzas ed obligaziuns**

La mussadra ha d'ademplier las obligaziuns tenor ordinaziuns cantunalas e lescha da scoletta dalla vischnaunca, oravontut:

1. Preparaziun e planisaziun dalla lavur sco era l'instrucziun da scoletta, incl. temps da survegionza avon e sunter l'instrucziun
2. Tgiral il contact culs geniturs e cussegl da scola
3. Dar **en cass urgents** lubientschas da congedi per max. 3 dis ad onn
4. Ademplier incumbensas specialas surdadas dil cussegl da scola
5. Ella ha l'obligaziun da procurar ch'ils reglaments che stattan sut sia survegionza vegnien exequi.
6. Mintgamai ina gada ad onn ei ella obligada d'organisar ina sera da geniturs.

Directivas generalas

Art. 13 **Segiradas**

Segiradas per la scoletta ei caussa dil purtader.

Ils affons ein segirai encunter mortori ed invaliditad entras la segirada da scoletta duront scoletta, il viadi a scoletta e retourn a casa. (Tenor lescha davart la segirada da malsauns ei la segirada encunter accident integrada ella segirada da malsauns).

Art. 14 **Transports**

Organisaziun da transports dils scolarets ei caussa dil cussegl da scola en convegnientscha cun la **suprastonza communal**.

Art. 15 **Definiziun**

Per tut quei ch'ei buca definiu en questa lescha vala l'ordinaziun cantunala.

Art. 16 **Approbaziun**

Questa lescha da scoletta va en vigur cun l'approbaziun entras la suprastonza communal ed il cussegl da scola.

Conclus dalla suprastonza communal dils 11.1.1999 (**revisiun dils 11.4.2001**)

Conclus digl cussegl da scola dils 16.12.1998 (**revisiun dils 9.5.2001**)

SUPRASTONZA COMMUNALA

Il president: *Capaul Leo*

Igl actuar: *Casanova Toni*

CUSSEGL DA SCOLA

Il president: *Menzli Marcus*

Igl actuar: *Coray Johanna*